


FASNACHTSGESELLSCHAFT



BASEL STAMM GEGR. 1955

Fasnacht 2017

misland isch disland - gmainsam statt ainsam

In Skagaströn, e Doorf soo glai
isch dr jung Bueb Snorre dehai
Scho syt dä Gnopfli dängge kaa
Leggt är sini läädriige Stiifel aa
Het Hemmli, Mantel und Helm drby
Und rennt em Babbe hinde dry
Dä hittig Daag isch ganz e bsundre
S fraidig Gsicht duet nid vrwundre
Dr Snorre deerf nämlig s erscht Mool hit
Uff s helzriige Boot Kristina mit
Ans Wettfische, ans traditionelle
Das het äär syt em Kindsgsi welle
Under behuetsaamem Schutz vo Odin und Thor
Wird kämpft, um e aige Fischfang Seggdoor
Dr Olaf, dr Björn und dr bäärtig Andri
Sin d Konkurränz und uff aigne Boot drby
Doch dusse denn uff rauer See
Hän die fimf dä Schdurm nid gsee
Dr Snorre wär am liebschte haim
Denn d Wälle sin so grooss wie Baim
Hän d Boot im Griff, leen kai Mascht lo stoo
Bis zwai vo vier Boot dien undergoo
Bevor d Naduur die zwai ka moorde
Und d Boot vom Meer verschluggt sin woorde
Vrschwinde d Gedangge vo Konkurränz
Vo falschem Stolz und Dekadänz
Als Team isch me stargg, doch ellai zerbrächlig
D Wett ums Gebiet wird nääbesächlig
Als Ego goosch under und bisch drnääbe
Duur Zämmehalt bhalte die fimf iir Lääbe

Au wenn du uff dr noordische See
Wikinger mit Helm hit nimm kaasch gsee
heebe Fraue und Männer vo dert oobe
Hit no zämme, daas muesch ne loobe
Me hets im letschte Summer gsee
Dass d Fuessballherre vo iibersee
Als starggi Drubbe uffmarschiert
Und soo Land um Land hän abserviert
All die Sons sin aagfiert woorde
Vo blau wyss gschminggte Fäänkohoode
S hän sich acht Prozänt vo däären Insle
In Frankriich s Gsicht blau wyss loo binsle
Hän iiri Elf duur d EM gstitzt
Und wie me seet, het s ganz guet gnitzt

Dr Ronaldo und s protugyysisch Koorps
Nimmt Island numme als Deschtlauf woor
Häns ungeniert uff d Schbitze driibe
Dr Matsch isch unentschiide bliibe
Mit ains zue ains, ganz ooni bädde
Isch me Ungarn gegeniiberdrädde
Doch uff dr raue EM See
Hän d Wikimänner dä Schdurm nid gsee
Z Reykjavík zittre sy deheim
Dr neggscht Geegner isch so gross wie Baim
Die glaini Insle geege die groossi
Jä daas Spiil ka jo numme famoos syy
Fääns und Mannschaft lääben uff
Und setze gladd no aine druff
D Besatzig vom isländisch Fuessballschiif
Umschiift gekonnt e jeedes Riff
Dä Zämmehalt hän d Sons gscheit gnutzt
Und dä änglisch Sturm vom Raase butzt
Und allewyyl spiilt dr Zuefall mit
Vier Daag devoor - me glaubts fascht nid
Het dä Schdurm allem Aanschyyn aa
Au in dr EU uffsmool ussgschdirmt kaa
Europa rysst e groobi Schnutte
Wisoo kaa Island uffsmool schutte?
D Vulkän sin dschuld, die hän – s isch glacht
Fyyr under de yysige Fuudis gmacht
So dääts em Baschi Dürr, däm Joggi
Au guet, wenn äär mol uff ain hoggi

Doch Franggryych setzt däm Draum en Ändi
Schiggt Island haim, daas isch d Wändi
Au wenn dr Draum vom grooss Bokaal
Numme ain isch bliibe, hesch duu d Waal
Dr isländisch Fungge wyter z daile
um d Wält vom Egoismus z haile
Duur Zämmehalt wird mee erraicht
S wird nid gfault und s Gool wird braicht
Duur Zämmestoo kunnsch guet voraa
Als Team griegsch jeede Geegner draa
Denn graad in dene schwääre Zytte
Wo vrgääbens d Friidensglogge lytte
Wo Angscht und Terror s Gschee bestimme
Findsch Muet und Froosinn aifach nimme
Bevoor dii Kopf numme no losch hängge
Vrsuech an d Gschicht vom Snorre z dängge
Dr Kampf gwinnsch numme mit Zämmestoo
De gmainsam statt ainsam duesch wytergoo
Wenn jeede hilft und nid duet waarte
Griegt jeede Schdurm die rooti Kaarte
S git jeedem d Kraft und d Gwissheit mit
kaasch sicher syy, de vertrumpsch di nid

Vyyl Kunschtwärgg steen nid im Absyts
sondern an dr Ladärneusstellig uff em
Minschterblatz und an dr Uusstellig vo de
Wääge- und Reggwisyte bi dr Kasärne vom
Mäntig Zoobe bis am Mittwuch demorge.